

四庫全書

子部

欽定四庫全書

子部

山堂肆考卷一百六十六

詳校官中書臣閔思毅

主事臣祁韻士覆勅

總校官降調編修臣倉聖脉

校對官中書臣李荃

謄錄監生臣王焜

欽定四庫全書

山堂肆考卷一百六十六

明

彭大翼

撰

技藝

師巫

男巫掌望祀望衍授號女巫掌歲時祓除釁浴說文  
男曰巫女曰覡

舞雩

周禮司巫掌羣巫之政令若國大旱則帥巫而舞雩國

有大裁則帥巫而造巫恒

守瘞

周禮司巫凡祭事守瘞注云祭而埋瘞祭之終也師巫守之禮畢乃去

下招魂

宋玉招魂賦帝告巫陽曰有人在下我欲輔之魂魄離散汝巫予之巫陽乃下招曰魂兮歸來些

預知死生

莊子曰鄭有神巫曰季咸知人死生存亡禍福壽夭期以歲月旬日若神鄭人見之皆棄而走列子見之而心醉

用雞為卜

漢郊祀志東甌王敬鬼壽一百六十歲迺命粵巫立粵祝祠而以雞卜云武帝信之粵祠雞卜自此始

召虎登壇

神巫能結壇召虎令登壇人有罪者虎傷之無罪者虎

不顧

聘娶良女

見縣尹上

詐怖愚民

漢第五倫拜會稽守會稽俗多淫祀民常以牛祭神倫  
移書屬縣曉告百姓云巫祝有依託鬼神詐怖愚民者  
皆案論之有妄屠牛者吏輒行罰後遂斷絕

作蠱埋宮

漢武末年衛后寵衰江充用事與太子衛后有隙乃使胡巫作桐木人埋太子宫充因白言宮中有蠱氣遂至太子宫掘蠱得桐木人帝遂廢太子

挾邪入禁

見宗族

家不用巫

顏之推家訓吾家巫覡符章絕于言議汝曹所見勿為妖妄

疾不呼巫

李世勣有疾家欲呼巫不許

求媾

唐棣王琰妃韋氏以有過置別室乃求巫者密置符于琰履中以求媾

祈豐

唐羅隱曰荆楚人淫祀者多矣有巫頗聞於鄉閭其初為人祀也筵席尋常歌迎舞將祈疾者健起祈歲者豐



穰其後為人祀也羊豬鮮肥清醑滿卮祈疾得死祈歲  
得饑里人忿焉而思之未得適有言者曰吾昔游其家  
也其家無甚累故為人祀誠心罄乎中而福亦應乎外  
其胙必散之其後男女蕃息焉衣食廣大焉故為人祀  
誠不得罄於中而神亦不歆乎外其胙且入其家是人  
非前聖而後愚蓋牽於心而不暇及人耳以一巫用心  
尚爾況異於是者乎

禁其惑人

唐陳子昂上言巫呪營惑於人者禁之

勒以為農

宋陳希亮知長沙縣毀淫祠數百區勒巫為農者七十餘家

厭怪

劉文靖家數有怪召巫夜披髮銜刀為禳厭

敗釀

容齋隨筆襄陽鄧城縣巫師能用妖術敗酒家所釀凡

開酒坊者皆畏之

尅擇

史記占候時名通名日者

疾日忌舉樂

檀弓乙卯不樂注云桀以乙卯日死紂以甲子日死謂之疾日故君不舉樂

灾月不上官

今之上官者多忌正五九月或謂宋朝火德火生於寅

旺於午墓於戌此三箇月謂之灾月官員例減祿料無羊故謂之無羊月衆皆避之又武德詔此三月不行死刑禁屠殺

塋母不問

東漢郭鎮傳河南吳雄少家貧喪母營人所不封土擇塋其中喪事趣辦不問時日巫者皆言當族滅雄後致位司徒子孫三世廷尉

納后無忌

晉穆帝納后欲用九月或謂九月是忌月博士曹耽荀  
訥等竝謂禮無忌月之文王治曰若有忌月當有忌歲  
修繕忌犯土

東漢安帝時皇太子有驚疾不安欲避幸乳母野王聖  
舍太子厨監邴吉以為聖舍新繕修犯土禁不可久御  
又宋容齋隨筆今世俗營建宅舍或小遭疾厄皆云犯  
土故道家有謝土司章奏之文

婚姻忌當梁

晉張華少孤貧鄉人劉毅竒其才以女妻焉華嘗著感  
婚賦云彼婚姻之俗忌惡當梁之在行俗以子午卯酉  
為當梁年不可娶婦舅姑重禁之

惟主五行

史記褚先生曰臣為郎時與太卜待詔為郎者同署嘗  
言曰孝武帝時聚會占家問之某日可娶婦乎五行家  
曰可堪輿家曰不可建除家曰大吉叢辰家曰大凶歷  
家曰小凶天人家曰小吉太乙家曰大吉辯訟不決以

狀聞制曰避諸死忌以五行為主蓋人取於五行者也不忌四廢

宋武帝初平司馬休之加嶺南蠻校尉將拜遇四廢日佐吏白改日帝不許

不拘反支

東漢明帝時公車以反支日不受章奏帝聞而怪之曰民廢農業遠來詣闕復拘以禁忌豈為政之意乎遂蠲其制

不忌往亡

晉武帝攻慕容超諸將曰往亡之日兵家所忌帝曰我往彼亡吉孰大焉遂平廣固

不避辰哭

唐鄒公張公謹卒太宗將出次哭之有司奏曰在辰不可帝曰君臣猶父子也情感於內安有所避遂哭之

不忌甲窮

王正以六甲窮日忌不出兵鄧禹因得治兵勒衆以獲



劉均

魏武破麟

後魏武討賀麟太史令姚崇曰紂以甲子日亡兵家忌  
之帝曰紂以甲子亡周武不以甲子勝乎崇無以對遂  
進軍大破之

苻堅伐晉

晉苻堅引羣臣謂曰吾將薄伐南裔如何左衛率石越  
曰今歲鎮星守斗牛福德在吳不可犯也堅曰武王伐

紂逆歲犯星天道幽遠未可知也以吾之衆旅投鞭於江足斷其流

故犯妖禁

唐肅宗時司隸校尉趙興每入官舍輒更繕修改築故犯妖禁子孫三世廷尉

不信太歲

宋董表儀家住沙河塘欲撒屋掘土術者言太歲方不可興工董不信既而掘深三尺得一肉塊漫漫然人言

即太歲也董乃投諸河後亦無禍

彼宅之右

晉孫思邈傳舊疑歲神在卯此宅之左則彼宅之右何得俱忌於東邈以為太歲之屬自是游神譬如日出之時向東皆逆非謂藏體地中也

西家之東

宋建隆三年五月詔修大內時太歲在戌司天監以興工之禁移有司藝祖按視見之怒問所由司天以書對

上曰東家之西即西家之東太歲何居焉使二家皆作歲將誰凶司天不能答

興工無忌

宋嘉祐中將修東華門太史言太歲在東不可犯仁宗批其奏曰東家之西乃西家之東西家之東乃東家之西太歲果何在其興工勿忌

出行不擇

宋邵康節先生出行不擇日或告之以不吉則不行蓋

曰人未言則不知人既言則有知而必行是與鬼神敵也

### 作畫

晉顧愷之曰畫人最難次山水次狗馬若臺閣一定器耳韓子曰狗馬難鬼神易狗馬乃凡俗所見鬼神則譎怪之狀人所不見者謝奕畫品曰畫有六法一曰氣韻生動二曰骨力用筆三曰應物象形四曰隨類賦彩五曰經營置位六曰傳移模寫

畫家三祖

晉以來顧長康張僧繇陸探微所畫通神為畫家三祖  
長康愷之字小字虎頭

畫師三靄

沙門元靄蜀人又有李靄之居金波亭號金波處士又  
有李靄俱善畫號畫師三靄

誤點成蠅

吳志注吳曹不興畫屏風墨落點素因就畫作蠅既御

孫權謂是真蠅舉手彈之

誤筆成牛

晉書王獻之善丹青桓溫使畫扇筆誤落因就畫作一  
烏駁牯牛甚妙

醉中灑壁

筆談永嘉僧釋仁善畫松一日夢見四百條龍自是畫  
松臻於神妙每醉揮墨醒後乃補之形狀極於奇怪嘗  
醉永嘉市中顧竹壁取拭盤布濡墨灑其上來日少增

修為狂根枯枿人服其神

醒後畫地

東齋記事蜀李懷袞善畫山水雖夜中酒醒或睡覺得意時急起畫於地遲明寫之則優於平居所畫也

迹簡意淡

名畫記上古之畫迹簡而意淡顧陸之流是也中古之畫細密而精微展鄭之流是也山水之變始於道玄成於李思訓父子樹石之狀始於韋偃窮於張通



心存目想

筆談度支員外郎宋迪工畫尤善為平遠山水其得意者有瀟湘八景往歲小窰村陳用之亦善畫迪見其畫山水謂用之曰汝畫信工但少天趣汝先當求一敗牆張絹素訖倚於敗牆之上朝夕觀之既又隔素見敗牆之上高平曲折皆成山水之象心存目想高者為山下者為水坎者為谷缺者為澗顯者為近晦者為遠神領意造恍然見其有人禽草木飛動往來之象了然在目

則隨意命筆默以神會自然景皆天就不類人為是謂活筆用之自此畫格遂進

解衣盤礴

莊子曰宋元君將畫圖衆史皆至受揖而立舐筆和墨在外者半有一史後至者僮僮然不趨受揖不立因之舍公使人視之則解衣盤礴羸君曰可矣是真畫者也注云盤礴箕踞之狀羸即裸也東坡形容與可畫竹詩曰神閑志定始一掃亦近此意

執筆熟視

蘇東坡書文與可偃竹記畫竹必先得成竹於胸中執筆熟視乃見其所欲畫者急起從之振筆直遂以追其所見如兔起鶻落少縱則逝矣與可之教予如此予不能然也心識其所以然而不能然者內外不一心手不相應不學之過也故凡有見於中而操之不熟者平居自視了然而臨事忽焉喪之豈獨竹乎

二史百家

名畫記顧愷之陸探微張僧繇北齊楊子華隋董仲仁  
展子竒唐吳道子鄭虔皆以畫名顧陸張吳為五經楊  
鄭董展為三史餘畫為百家按道子名道玄因避明皇  
諱改為道子

幽人處女

東坡書王主簿畫瘦竹如幽人幽花如處女低昂枝上  
雀搖蕩花間雨若人留天巧春色入毫楮懸知君能詩  
寄聲求妙語

通靈

世說顧長康曾以一厨畫糊題寄桓玄家皆其所珍惜者玄乃發厨取之封題如初畫竝不存長康見之直云妙畫通靈變化而去了無怪色

入神

唐王維字摩詰畫師入神名盛於開元天寶間豪英貴人莫不虛左以迎至畫平遠山水雲勢石色繪工以為天機所到學者不及也

桓玄示賓

水衡記非好事者不可妄傳書畫近火不可觀書畫向  
風日正涕唾不洗手不可觀書畫昔桓玄好畜法書名  
畫嘗出示賓客有客正食寒具以手捉書畫大點污玄  
惋惜移時自後每出書畫輒令洗手注云寒具如今之  
油煑環餅也又朱芾字元章喜畜書畫號海岳外史

立本戒子

唐太宗與侍臣泛舟春苑池見異鳥容與波上悅之詔

坐者賦詩而召閻立本摹狀閣外傳呼閻立本立本是時已為主爵郎中俯伏池左研吮丹粉望坐者羞恨流汗歸戒其子曰吾少讀書文辭不減儕輩今獨以畫見名與厮役等若曹慎毋習之

壁上畫驢

吳道子嘗訪僧僧不禮遂於壁上畫驢一頭一夜僧房家具盡踏破惱亂不堪僧知是道子為之懇塗却畫乃已

壁上畫馬

唐寧王善畫馬花萼樓壁上有六馬滾塵圖明皇最眷  
愛玉面花驄風鬃霧鬣纖悉備具後壁上止存五馬信  
知神物變化不測也又名畫記唐江都王緒霍王元軌  
之子善畫鞍馬老杜詩云國初已來畫鞍馬神妙獨數  
江都王即此又李嗣真畫品北齊楊子華畫馬於壁每  
夕必跽齧長鳴如索水草號為畫聖

蜂蝶至



葆光錄王耕善畫而牡丹最佳春日張於庭廡間則蜂蝶萃至耕本業文因畫所掩竟不成事

雷雨垂

杜子美題韋偃雙松歌天下幾人畫古松畢宏已老韋偃少絕筆長風起纖末滿堂動色嗟神妙兩株慘裂苔蘚皮屈鐵交錯回高枝白摧朽骨龍虎死黑入太陰雷雨垂

與可畫竹

東坡詩老可能為竹寫真老可文與可也名同少以文學知名又劉道醇名畫評蜀黃筌凡所操筆皆逼真

趙昌畫花

東齋記事蜀有趙昌善畫花每晨露遶欄諦玩手中調色寫之自號寫生趙昌人謂趙畫染成驗之者以手捫摸不為彩色所隱者乃真也或云昌畫花意在似徐熙意在不似非高於畫者不能以似不似定其高下蓋意不在似者太史公之於文杜少陵之於詩是也

鄭虔三絕

唐鄭虔善圖山水嘗自寫其詩并畫以獻帝大署其尾  
曰鄭虔三絕謂畫好詩好字好也又顧愷之亦有三絕  
花光三昧

衡州花光長老工畫墨梅黃山谷曰昔花光長老得墨  
梅三昧如嫩寒清曉行孤山籬落間但無香耳

不服道子

邵氏錄楊惠之與吳道子同師張僧繇學畫惠之見道

子筆法已至不服居其次乃學塑亦為古今第一

不知僧繇

后山談叢唐閻立本觀張僧繇金陵畫壁曰虛得名耳  
再往曰近代名手三往於是寢食其下數日而後去夫  
閻以畫名一代與張高下間耳而猶不足以知之世之  
人強其不能而論能者之得失不亦踈乎

雪裏芭蕉

筆談書畫之妙當以神會難以形求世之觀畫者唯能

指摘其間形象位置采色瑕疵而已至於奧理冥造者罕見其人如彥遠畫評言王維畫多不問四時如畫花往往以桃李芙蓉蓮花同畫一景予家所藏摩詰畫袁安卧雪圖有雪中芭蕉此乃得心應手意到便成故造理入神迴得天意此難以俗論也

日中牡丹

歸田錄歐公得一古畫牡丹下有猫吳正肅公一見曰此正午牡丹也其花披哆而色燥此日中時花也猫眼

朝暮不同黑晴如線乃正午猫眼也

煙霧即生

唐吳道子畫殿內五龍鱗甲飛動每天將大雨即生煙霧

神氣迴出

湘山野錄宋初江南布衣徐熙與偽蜀翰林待詔黃筌皆以善畫花著名筌與二子居寶惟亮皆隸圖畫院其後徐熙至京師送畫院品其畫格諸黃妙在傅色用筆

極細不見墨迹但以輕色染成謂之寫生徐熙以墨筆畫之殊草草略施丹粉神氣迥出別有飛動之意筌惡其軋已言熙畫麓惡不入格罷之熙之子乃效諸黃格更不用墨直以彩色圖之謂之沒骨圖其工與諸黃不相上下筌等不復瑕疵遂得齒院品然其氣韻皆不及熙遠甚

雷霆破壁

唐張僧繇在金陵安樂寺壁畫四龍不點睛每云點之

則飛去人以為誕因點其一須臾雷霆破壁一龍乘雲上天不點睛者皆在

夫婦造門

劉洞微善畫龍一日有夫婦造門曰龍有雌雄其狀不同雄者角邊凹峭目深鼻豁鬣尖鱗密上壯下殺朱火煜煜雌者角靡眼平鼻直鬣圓鱗薄尾壯于腹洞微曰汝何以知之二人曰吾乃龍也遂化為二龍騰空而去

以大觀小



筆談李成畫山上亭館及樓塔之類皆仰畫飛簷其說以為自下望上如人平地望塔簷間見其榱桷此謬論也大都畫山水之法蓋以大觀小如人望假山以上望下只合見一重山又如屋舍不應見中庭及後巷李君不知以大觀小之法折高折遠自有妙理豈在掀屋角也

以大為小

筆談畫牛虎皆畫毛惟馬不畫毛予以問畫工工言馬

毛細不可畫予難之曰鼠毛更細何以卻畫工不能對  
大凡畫馬其大不過盈尺此乃以大為小所以毛細不  
可畫鼠乃如其大自當畫毛然牛虎雖是以大為小理  
亦不應見毛但牛虎深毛馬淺毛理須有別故名輩為  
小牛小虎雖畫毛但約略拂拭自有神觀若畫馬如虎  
之大理當畫毛

妄寫形狀

筆記有藏戴嵩所畫鬪牛圖與客觀者旁有一牧童曰

牛鬪力在前尾入兩股間今尾掉何也

須驗時代

水衡記吳道子畫仲由戴木劔閭令公畫昭君著帷帽  
殊不知木劔創於晉代帷帽興於本朝舉此凡例亦畫  
之病也且如幅巾傳於漢魏羃羅起自齊隋幘頭用於  
周朝巾子創於武德短服靴衫豈可輒施於古象衣冠  
組綬不宜長用於今人芒屨非塞北所宜牛車非嶺南  
所有詳辯古今之物商較土風之宜指事會形須驗時

代然後可以議畫

觀畫修福

朱景玄畫斷吳道子畫地獄變相後成都人來觀者咸懼罪修福田兩市屠沽魚肉不集

觀畫施錢

顧愷之建康實錄注云京師寺記興寧中瓦官寺初置僧衆設會請朝賢鳴刹注疏其時士大夫無有過十萬者既至長康直打刹注一百萬長康素貧時以為大言

後寺成僧請勾疏長康曰宜備一壁遂閉戶往來百餘日畫維摩一軀工畢將欲點眸子謂寺僧曰第一日開見者責施十萬第二日開可五萬第三日可任例責施及開戶光明照寺施者嗔咽俄而果至百萬錢也

登樓作畫

南齊謝奕畫品顧愷之建層樓為畫所疾風暴雨烈暑初寒竝不下筆炎涼皆過天地明朗乃染毫登樓去梯妻子罕見

鑿垣貯畫

唐王涯居永寧里好蓄名書畫以金玉為奩軸鑿垣貯之重複固秘及被誅為人破垣剔取金玉而棄書畫於道

能畫山林

名畫評營丘李成能畫山林時稱第一

善畫人物

圖畫志東丹王善畫人物鞍馬而馬尚豐肥筆乏壯氣

按契丹安巴堅以長子托雲為東丹王後奔于唐明宗  
賜姓李更名贊華又宋淳化元年太宗出古畫藏之閣  
上有顧愷之畫王維像韓幹馬薛稷鶴戴嵩牛又近代  
東丹王李贊華千角鹿蜀黃筌白兔皆一時之妙也

### 道子中規

吳道子嘗畫佛留其圓光對萬衆中舉手一揮圓中規  
觀者驚呼不知畫家自有法但以肩倚壁自然中規吳  
道子之妙不在此也

東丹得骨

古今畫番馬者胡瓌得其肉東丹得其骨

氣韻瀟灑

五代營丘李成字咸熙善畫山水王朴與之善其畫平遠寒林氣韻瀟灑古今一人真畫家百世師也昔稱王維李思訓之徒不可同日而語

神彩飛動

筆談王鉞據陝州集天下良工畫聖壽寺壁為一時妙



絕畫工凡十八人盡殺之使天下不復有此筆今佛母  
壁最奇神彩飛動鬼母瘦佛次之

薛稷畫鶴

杜詩薛公十一鶴皆寫青田真薛公謂薛稷也

陸溉畫獅

建康有陸溉患瘡醫療無效有顧光實能畫遂命筆畫  
一獅子令於外榜之謂陸曰可虔心祈禱當有驗溉如  
言中夜聞戶外有窸窣之聲明日看獅子口臆有血淋

漑漑病乃愈又秦太虛云予卧病高符仲攜摩詰輞川圖示予曰閱此可愈病予喜甚恍然若與摩詰入輞川數日疾愈

一日而就

唐玄宗天寶中忽思蜀嘉陵江水遂假吳道子驛遞令往寫貌及回帝問之奏云竝記在心令於大同殿圖之一日而就時將軍李思訓亦以山水擅名畫大同殿數月方畢上曰李思訓數月之功吳道子一日之跡皆極

其妙也

半年而畢

董羽江左人善畫水太宗作端拱樓命羽四壁畫龍水極其精思半年而畢意望恩賞太宗與宮嬪登樓皇子幼遙見畫壁驚懼亟令朽墁之卒不獲賞

意在塵外

唐王維晚年得宋之問藍田別墅在輞川畫輞川圖山谷盤鬱雲水飛動意在塵外怪生筆端自題詩曰夙世

謬詞客前身應畫師

色聚毫端

李彭詩往時李成寫驟雨萬里古色毫端聚人行深藏  
鳥不度便覺非復鶩溪素

王宰真跡

杜甫戲題王宰畫山水圖歌十日畫一水五日畫一石  
能事不受相促迫王宰始肯留真跡尤工遠勢古莫比  
咫尺應須論萬里焉得并州快剪刀剪取吳淞半江水

惠崇小景

王荆公詩注僧惠崇建陽人工畫鷺鴈鷗鷺尤工小景  
及煙汀霧渚瀟灑虛曠之狀又工詩

韓幹入室

杜子美曹將軍丹青引先帝天馬玉花驄畫工如山貌  
不同是日牽來赤墀下迴立閭闔生長風詔謂將軍拂  
絹素意匠慘淡經營中斯須九重真龍出一洗萬古凡  
馬空玉花卻在御榻上榻上庭前屹相向至尊含笑催

錫金園人太僕皆惆悵弟子韓幹早入室亦能畫馬窮  
殊相幹惟畫肉不畫骨忍使驂駟氣凋喪將軍畫善蓋  
有神必逢佳士亦寫真途窮反遭俗眼白世上未有如  
公貧但看古來盛名下終日坎壈纏其身按曹將軍名  
霸幹嘗師之

吳生擅場

杜子美詠吳子畫畫手看時輩吳生遠擅場

更工松石

韋偃伯父工龍馬父鸞工山水松石偃工山僧老松異  
石人知其善馬不知其松石更工咫尺千尋駢柯攢影  
煙霞噴薄風雨颼颼輪困盡偃蓋之形宛轉極盤龍之  
狀

猶精翎毛

濠梁崔白雖以敗荷鳧鴈得名然猶精於花竹翎毛

雙筆齊下

唐張藻善畫常以手握雙筆一時齊下一為生枝一為

枯枝生枝則潤含春澤枯枝則乾裂秋風又張愛賓云  
王獻之能為一筆書陸探微能為一筆畫

信手掃出

姜邦傑題李仲永家墨梅寫竹如草書患俗不患清畫  
梅如相馬以骨不以形又云當時一派屬蘇公雨葉雲  
枝略相似花光老人發天機信手掃出孤山姿

刮造化窟

杜甫畫鷗行高堂見生鷗颯爽動秋骨初驚無拘攣何



得立突兀乃知畫師妙巧刮造化窟寫此神俊姿充君  
眼中物

竊天地工

司馬君實謝人惠草蟲扇吳僧畫團扇點綴成微蟲秋  
毫宛皆具獨竊天地工細者乃蛛蝨大者為阜螽枯枝  
擁寒蛸黃蕊粘飛蜂翩然得生意上下相追從徒觀飛  
動姿莫覩筆墨踪兒童取真物細較無不同恐其遂躍  
去亟取藏箱中乃知藝無小意精神可通不特誤圖蠅

能感紫髯翁

墨竹

黃山谷墨竹序墨竹起於近代不知其師承初吳道子作畫連筆作卷不加丹青意墨竹之師起于此

墨蘭

元趙仲穆者子昂學士之子宋秀王之後也能作蘭木竹石有道士張伯雨題其墨蘭詩曰滋蘭九畹空多種何似墨池三兩花近日國香零落盡王孫芳草徧天涯

仲穆見而愧之遂不作蘭

王墨潑絹

朱景玄畫斷王墨善潑墨故號王墨酒酣之後先以墨潑絹脚踏手捫隨其形象為山為水為石為樹倏忽造化不見其墨汚之處

與可投縑

東坡作文與可畫篔簹偃竹記與可畫竹初不自貴重四方之人持縑素以請者足相躡於其門與可厭之投

諸地而罵曰吾將以為鞭士大夫傳之以為口實及與  
可自洋州還而余為徐州與可以書遺余曰近語士大  
夫吾墨竹一派近在彭城可往求之鞭材當萃於子矣  
霜雪幹

杜子美題李尊師松老夫清晨梳白頭玄都道士來相  
訪握髮呼兒延入戶手提新畫青松障障子松林靜杳  
冥憑軒忽若無丹青陰崖卻承霜雪幹偃蓋反走虬龍

形

歲寒材

東坡詩偃蹇松枝隔煙雨知儂定是歲寒材百年根節  
要老硬將恐崩崖倒石來

蕭悅逼真

白居易贈協律郎蕭悅畫竹云植物之中竹難寫古今  
雖畫無似者蕭郎手下獨逼真丹青以來惟一人野塘  
水邊歌岸側森森兩叢十五莖嬋娟不生筠粉態蕭颯  
盡得風煙情舉頭忽看不似畫低耳靜聽疑有聲

周昉窮妙

唐周昉窮丹青之妙至畫美人女子為古今絕冠

遠淡近濃

唐吳融畫山水歌良工善得丹青理輒向茅茨畫山水  
地角移來方寸間天涯寫在筆鋒裏日不落兮月長生  
花片片兮水泠泠經年蝴蝶飛不去累歲桃花結不成  
一片石數株松遠又淡近又濃不出門庭三五步坐見  
江山千萬重

畫見夜隱

海外記宋太宗時李至獻畫牛畫則齧草欄外夜則歸  
卧欄中莫曉其理僧贊寧曰此幻藥所畫南海倭國有  
蚌淚和色著物畫見夜隱又沃蕉山有石磨色染物畫  
隱夜見

有詩

東坡云味摩詰之詩詩中有畫觀摩詰之畫畫中有詩

無墨

邵氏聞見錄荆浩曰山水之學吳道子為有筆無墨項容有墨無筆王維李思訓之流不數也

斌老忘形

黃山谷題斌老畫竹酒澆胸次不能平吐出蒼竹歲崢嶸卧龍偃蹇雷不驚公與此竹俱忘形

象先適意

蘇子瞻書朱象先畫後松陵人朱象先能文而不求舉善畫而不求售文以遣吾心畫以適吾意而已



以燈取影

蘇子瞻書吳道子畫後詩至於杜子美文至於韓退之  
書至於顏魯公畫至於吳道子而古今之變天下之能  
事畢矣道子畫人物如以燈取影逆來順往旁見側出  
橫斜平直各相乘除得自然之數不差毫末出新意於  
法度之中寄妙理於豪放之外所謂游刃餘地運斤成  
風蓋古今一人而已

隨物賦形

蘇子瞻書蒲永昇畫後古今畫水多作平遠細皴其善者不過能為波頭起伏使人至以手捫之然其品格特與印板水紙爭工拙於毫釐間耳唐廣明中處士孫位始出新意畫奔湍巨浪與山石曲折隨物賦形畫水之變號稱神逸其後蜀人黃筌孫知微皆得其筆法

雲際遠岫

林子來題文與可山水橫軸詩明牕十日復五日出此湖光與山色前身畫師語不妄文侯乃是金門客乍從

雲際辯遠岫爭數喬林誇遠力波漂菰米歲事空水濱  
樹下尚飛鴻欲投晚渡喚舟子急漿已入昏煙中徑思  
天邊望歸路錯認江鄉舊洲渚能傳萬里在尺素揮灑  
秋毫捲寒雨

山下危槎

宋張文潛題孫彥古風雨山水歌山深巖高石壁青白  
日忽變天晦冥墨風驅雲走不停驚電疾雨來如傾山  
前雨點大如手下水湧危槎橫崩崖古樹老有靈吼

怒直與風雲爭枝披葉偃鬪不怯萬竅卻欲藏雷霆

中流望平巘

東坡題文潞公跋郭熙畫玉堂畫掩春日閑中有郭熙  
畫春山鳴鳩乳燕初睡起白波青嶂非人間離離短幅  
開平遠漠漠疎林寄秋晚卻似江南送客時中流回頭  
望平巘

層波擁虛壁

戴式之毘陵寺壁畫水詩可人筆端有許力捲來一片

瀟湘碧摩挲老眼看不真怪見層波擁虛壁

被髮觀音像

畫品被髮觀音變相在水中石上襲衣寶絡被髮按劍而坐必五代晚唐名輩所作筆細而有力似吳道玄獨設色太重衣上花文不類吳筆或云朱繇所作

長帶觀音像

長帶觀音宋龍眠居士李公麟所作公麟登進士第學佛悟道深得微旨立朝籍籍有聲博求鐘鼎古器珪璧

寶玩森然滿家雅好畫心通意會真造玄妙士大夫以  
為鞍馬愈於韓幹佛像可近吳道玄山水似李思訓人  
物似韓滉非過論也今觀此像固非世俗可以彷彿而  
紳帶特長一身有半蓋出奇眩異使世俗驚惑而不失  
其勝絕處也又補陀觀音像蜀勾龍爽所作具天人種  
種殊相使人瞻之敬心自起筆氣清潤意通幻妙所居  
補陀山在海孤絕處煙巒蒙密佳氣藹然

作莊嚴相

正坐佛唐趙公祐所作世俗畫佛菩薩者或作西域相  
則拳髮虬髯窮鼻黝目一如胡人或作莊嚴相則妍柔  
姣好綺衣寶服一如婦人皆失之矣公祐所作三十二  
相八十種好皆具而慈悲威重有巍巍天人師之容真  
可寶也

結跏趺坐

大佛像蜀張南本所作世之畫史但能寫佛之定形故  
水火之狀難盡其變始張南本與孫位竝學畫水皆得

其法南本以為同能不如獨勝遂專意畫火獨得其妙  
今此辟支佛結跏趺坐火周其身筆氣煥銳得火之性  
觀者以為煙飛雷掣烈烈有焚林燎原之勢佛以定慧  
力坐其間安然不動則毫末小利害足以動其心乎跏  
趺屈足坐也

畫美女

湖海奇聞汾州尤孔昭後圃亭壁上有古畫美女孔昭  
時時閱之戲曰得伊一宿豈吝千金中秋賞月酣歌之



際一美女捧酒榼進曰妾隣女也郎君賞月故送酒以助清宵之歡孔昭大悅與飲留宿自是旦去暮來幾一月忽不復至其壁上畫亦亡

### 畫啼兒

夷堅續志元澹善畫入神嘗至僧寺畫一婦人乳一小兒于壁間後遇夜有兒啼聲僧怪之一日澹復至僧以為言澹笑曰若欲止其啼甚易耳乃舉筆添乳入口自此啼聲遂止

畫貓

洞天清錄何尊師作貓則鼠皆遠避

畫鼠

洞天清錄石恪作飛鼠張之則鼠不入室

畫龜

酉陽雜俎術士王瓊取瓦一片畫作龜甲懷之少頃置  
之地上即成真龜循行庭下

畫鴈

筆記蜀人黃筌畫飛鴈頭足皆展殊不知飛鳥縮頭則展足縮足則展頭無兩展者然余嘗見鶴飛頭足皆展則前說又不足憑矣

### 渡水牛

渡水牛朱梁時道士厲歸真所作青林淺草牛與牧人情味俱適筆簡意盡氣韻瀟爽與戴嵩韓滉所畫未知其孰賢也

### 出山虎

厲歸真畫虎毛色明潤其視眈眈有威作百獸之意嘗  
作棚於山中大木上觀虎真態又或自衣虎皮跳躑于  
庭以思倣其勢今觀此圖非心識意解未易得其自然  
長文善鑒

梁元帝為荊州刺史時作番客入朝圖畫筆神妙紙縫  
有褚長文審定印章蓋長文鑒畫有名千古定然知此  
圖不凡也

張茂請觀

龜山語錄經筵承受張茂嘗招講官啜茶觀畫程明道先生曰吾平生不啜茶亦不識畫竟不往或云伊川

有花竹勝

唐闕同所作仙游圖大石叢立屹然萬仞四面斬絕不通人跡而深巖委澗有樓觀洞府鸞鶴花竹之勝杖屨而遨遊者皆羽毛飄然若仰風而上征者非仙靈所居而何

無塵埃氣

樓居仙圖宋郭恕先所作恕先嘗仕於朝卒以放浪玩世流竄海島中道仆地蛻形仙去其圖寫樓居瀟散簡遠無塵埃氣東坡先生嘗為之贊曰長松參天蒼壁插水縹緲雲觀憑欄誰子空濛寂歷煙雨滅沒恕先居焉呼之或出非神仙中人孰能知神仙之樂而審於畫也恕先名忠恕洛陽人七歲能屬文舉童子及第

通神佳手

炙轂子曰開元中李思訓畫大同殿壁明皇諭之曰卿

所畫夜聞水聲真通神佳手也

絕代妙手

唐高適畫馬篇君侯樞上驄貌在丹青中馬毛連錢蹄  
鐵色圖畫光輝驕玉勒馬行不動勢若來權竒蹴踏無  
塵埃感茲絕代稱妙手遂令談者不容口麒麟獨步自  
可珍駑駘萬匹知何有

楚公畫鷹

杜甫題姜楚公畫鷹楚公畫鷹鷹戴角殺氣森森到幽

朔觀者貪愁掣臂飛畫工不是無心學此畫寫真在左  
綿卻嗟真骨遂虛傳梁間燕雀休驚怕亦未搏空上九  
天又齊廣寧王好綴文有技藝嘗於廳事壁畫一蒼鷹  
見者皆以為真

鍾隱作鷓

世俗畫鷓鴣鷹鷓之類皆作擒奮搏擊之狀欲示其猛  
隱所作鷓子坐枯枝上貌甚閑暇注目草中之鷓其意  
欲取蹲踞得兵家所謂鷲鳥之擊必匿其形使人想其



霜拳老足必無虛下也

龍背烏頭

白居易詠八駿圖穆王八駿天馬駒後人愛之寫為圖  
背如龍兮頭如烏骨聳筋高脂肉少

風髻霧鬣

東坡詠韋偃牧馬圖神工妙技帝所收江都曹韓迹莫  
留人間畫馬惟韋侯當年為誰掃驂騑至今霜蹄踏長  
楸圉人困卧沙壠頭沙苑茫茫疾藜秋風髻霧鬣寒颼

騷

騎驢圖

宋黃叔達號知命君在黔中作數詩附山谷集中殊有家法嘗與陳履常謁法雲禪師夜歸衣白衫騎驢緣道搖頭而歌履常行於後一市驚以為異人明日李伯時畫以為圖邢敦夫作歌

騎牛圖

見致仕

荔枝圖

劉崇龜清儉凡姻舊干財者但作荔枝圖以與之

菡萏圖

趙昌善畫花設色明潤筆跡柔美國朝以來有名於蜀  
蓮花生於汙泥之中出於水而不著水昌作菡萏圖標  
韻清遠能識此意耳

老子出關圖

宋錢穆父尹京府生日楊次公畫老子出關圖作詩以

贈之詩曰秘藏函谷關中子來獻蓬萊閣上仙願得鬚  
眉如此老卻教龜鶴羨長年又世傳七賢過關圖或以  
為即竹林七賢或謂即論語作者七人或又云是唐開  
元間冬雪後張說張九齡李白李華王維鄭虔孟浩然  
出藍田關遊龍門寺鄭虔圖之宋虞伯生有題孟浩然  
像詩風雪空堂破帽溫七人圖裡一人存又有槎溪張  
輅詩二李清狂狎二張吟鞭遙指孟襄陽鄭虔筆底春  
風滿維詰圖中詩興長是必有所傳云

范蠡遊湖圖

見祝壽

醉僧圖

張僧繇始作醉僧圖道士每以此嘲僧羣僧於是聚錢數十萬與閻立本為作醉道士圖

流民圖

宋熙寧七年久旱百姓遷移逃竄鄭俠繪流民圖以獻

三笑圖

三笑事見溪類東坡書三笑圖後云近於士人處見石  
恪畫此圖三人者皆大笑至於衣冠手足皆有笑意其  
後三小童罔測所謂亦大笑世言侏儒觀優而笑或問  
其所見則曰長者豈欺我哉此畫正類此寫呈欽之兄  
想亦當捧腹絕倒撫掌盧胡冠纓索絕也

百戲圖

蜀石恪性不羈滑稽玩世故畫筆豪放出入繩檢之外  
而不失其奇嘗見所作鬼百戲圖鍾馗夫婦對案置酒

供張果肴及執事左右皆各述其情態前有大小鬼數十合樂呈伎倆曲盡其妙

### 六老圖

宋史浩淳熙乙巳掛冠歸四明年登八十女兄年八十二四弟又皆高年同氣至親舉觴相屬朱顏華髮咸壽而康繪為六老圖樓叅政為之序

### 五客圖

宋李昉家蓄五禽以客為名如鷗為閒客鷺為雪客鶴

為仙客孔雀為南客鸚鵡為西客又張祠部有十客圖  
耕織圖

虞伯生題耕織圖大意謂元有中原置十道勸農使總  
於大司農皆慎擇老成重厚之君子親歷原野安輯而  
教訓之功成省歸憲司憲司置四僉事其一曰勸農之  
官由是天下守令皆以勸農繫銜憲司以耕桑之事上  
大司農至郡縣大門兩壁皆畫耕織圖

風雨圖



宋夏珪字禹玉錢塘人寧宗時待詔畫院詔賜金帶嘗  
畫風雨圖張靖之題詩云長風吹折巔崖樹江色愁陰  
雨聲暮蒼茫野艇驚晚潮交楫橫篙無住處何人倚岸  
泛虛舟風雨不動安如流酒酣袒側蓬牕底忽憶瞿塘  
五月秋

對雉圖

藝文志竇師綸畫對雉圖一卷

乳虎圖

乳虎圖宣城包鼎所作包氏以虎世其家而鼎之所畫  
居最

袁安卧雪圖

王維畫袁安卧雪圖詳前雪裏芭蕉注

鍾馗行雪圖

華陽真人孫知微畫鍾馗破巾短褐束縛一鬼荷以擔  
端行雪林中想見其屢舉不第胸中不平又怒鬼物擾  
人擒捕繫搏戲用餘勇也知微筆墨神妙度越衆人乖

匡公詠鎮蜀雅聞其名欲一見之終不可致

鵝鴿圖

黃筌嘗畫金盆鵝鴿世稱絕筆

蛺蝶圖

唐滕王湛然善畫蝴蝶王建宮詞傳得滕王蛺蝶圖是也

賢已圖

宋元祐間黃秦諸君子在館暇日觀畫黃山谷出李龍

眠所作賢已圖博奕擣蒲之儔咸列焉博者六人方据一局骰迸盆中五皆茲而一猶旋轉不已一人俯盆疾呼旁觀皆變色起立纖穠態度曲盡其妙相與嘆賞以為卓絕適東坡從外來睨之曰李龍眠天下士顧乃效閩人語耶衆咸怪請其故東坡曰四海語音言六皆合口惟閩音則張口今盆中皆六一猶未定法當呼六而疾呼者乃張口何也龍眠聞之亦笑而服宋李公麟字伯時號龍眠居士

無逸圖

宋神宗朝孫奭嘗上無逸圖帝命施于講讀閣至是又  
召蔡襄寫無逸篇于閣屏

三教圖

宋馬遠號欽山其先河中人後居錢塘光寧朝待詔畫  
院嘗畫三教圖黃面老子則跣趺中坐猶龍翁儼立于  
傍吾夫子乃作禮于前此蓋內璫故令作此以侮聖人  
也一日傳旨俾古心江子遠作贊亦故以此戲之公即

贊之曰釋氏趺坐老聃傍睨惟吾夫子絕倒在地遂大稱旨又嘗畫山水圖

二疏圖

蘇東坡嘗作二疏圖贊

莊周垂綸圖

晉嵇含為郎中時弘農王粹以貴公子尚主館宇甚盛圖畫莊周垂綸之象命含為贊含援筆即成云畫真人于刻桷之室載退士於進趨之堂可謂托非其所可弔

而不可賀也

貫道據琴圖

車溪贇上人嘗與其徒月夜登閣聽江貫道鼓琴信手  
忘言曲盡其妙於是據琴而弗彈坐客莫不自失超然  
得意于絲桐之表隆茂宗乃畫為據琴圖

挾彈圖

世傳張仙像乃蜀王孟昶挾彈圖也初蜀王花蕊夫人  
入宋宮念其故主攜此圖懸于壁且祀之謹一日宋太

祖幸而見之致詰焉夫人跪答曰此吾蜀中張仙神也  
祀之能令人有子此花蓋欺太祖之言非實有所謂張  
仙也

脫靴圖

宋理宗時癸丑元夕上呼妓入禁中有唐安安者歌色  
絕倫帝愛幸之侍郎牟子才奏曰此皆董宋臣輩引誘  
壞陛下三十年自修之操子才又作高力士脫靴圖宋  
臣大怒持圖入謂上曰牟子才在當塗罵官家上視其



圖笑曰乃罵汝非罵我也宋臣曰彼謂陛下為明皇閻  
妃為太真臣為力士而以李太白自居自比上不悅按  
董宋臣內侍中之善逢迎者

觀潮圖

李嵩錢塘人李從訓養子工人物山水光寧理三朝待  
詔其徒有馬永忠豐興祖顧師顏皆傳其法張靖之嘗  
跋其觀潮圖云四海惟浙江潮最險雖如秦始皇猶畏  
從狹中渡宋自慶歷以來杭海屢溢論者皆以畿甸切

近為憂當時每遇潮盛之候傾宮出觀顧反以為太平  
樂事獨不思建炎之初苗傅劉正彥因觀潮起釁幾危  
社稷而復甘心于此嗟夫宴安酖毒雖利害切身亦不  
暇自為謀况有興復遠大之計哉

觀井圖

宋陳靖作彭祖觀井圖銘淳化中予將命之狄慕道由  
彭門有客得彭祖觀井圖以為賦中有臺榭人物山水  
森然繪事之工予無所取所取者唯彭氏面井而覆之

以輪背樹而纜之以繩凭杖欽躬跼蹐而迎視兢兢然  
若將墜也嗚呼古人臨事而懼有若是後之君子得無  
效與故作銘於座右

寰瀛圖

陳季卿家于江南舉進士不第遊青龍寺訪僧不值憇  
於閣有終南山翁亦俟僧久之見東壁有寰瀛圖季卿  
指圖曰安得自渭達河至家山翁笑曰此不難命折竹  
葉作舟置圖上令季卿熟視久之覺波浪起葉舟漸巨

恍然若登舟旬餘抵家至一更復登舟再遊青龍寺見  
山翁尚擁褐而坐季卿曰非夢乎山翁曰六十日當自  
知爾後妻子自江南來曰某日歸題詩於西齋始知非  
夢

雲漢圖

博物志漢桓帝時劉褒畫雲漢圖見者皆熱及畫北風  
圖見者皆寒

黃初平牧羊圖


顧愷之畫圖蘇東坡贊先生養生如牧羊放之無何有  
之鄉止者自止行者行先生超然坐其旁挾策讀書羊  
不亡化而為石起復僵流涎磨牙笑虎狼先生上賓羊  
服箱號稱雨工行四方莫隨上林芒屨郎鼻門舐地尋  
鹽湯

裴將軍射虎圖

唐李翱序世稱裴將軍射虎而不及見駕部郎中兼侍  
御史滎陽鄭公博物好古旌能尚藝于裴氏子得其先

人射虎圖傳以示予壯哉古今之未有倫也遂為之贊  
慢彼山戎噬我封略有群者虎載肆騰搏邊毗凜凜若  
崩厥角將軍出塞屏黜車騎進馬前當挺身以餌威有  
所服精有所聚氣全以雄力果而取勁弓雷霆長矢電  
激中口穿心貫胸洞腋視如空皮劃若破的據鞍遙叱  
揮箠逆擊閉目沉冥喪精辟易三軍駭呼萬靈動魄海  
波為騰塞草皆赤卞莊俟鬪方聞兩獲漢將如飛幾為  
所扼將軍如勇冠世超昔猿號未工飲羽非敵弧矢之

設以威四方群虎既夷狄人來降收闔罷扃山川以寧  
至今北荒猶畏其靈按裴將軍裴旻也玄宗開元中山  
戎寇邊命守北平川



山堂肆考卷一百六十六



欽定四庫全書

子部

山堂肆考卷百六十八

詳校官中書臣閔思毅

主事臣祁韻士履勛

總校官降調編修臣倉聖脉

校對官中書臣葉蘭

謄錄監生臣馬衍宗

欽定四庫全書

山堂肆考卷一百六十七

明

彭大翼撰

技藝

傳神

審象

商書高宗夢帝賚予良弼乃審厥象俾以形旁求于天  
下說築傅巖之野惟肖

圖形

漢宣帝甘露三年單于入朝上思股肱之美乃圖其人於麒麟閣法其形貌署其官爵唯霍光不名曰大司馬大將軍博陸侯其末曰典屬國蘇武明帝追感前世功臣乃圖畫二十八將於南宮雲臺始於鄧禹終於耿紀又有王常李通竇融卓茂合三十二人惟馬援以椒房之親不與唐太宗貞觀十七年圖畫勲臣於凌煙閣乃河間元王孝恭房梁公玄齡杜葉公如晦魏鄭公徵李衛公靖李英公勳虞永興公世南尉遲鄂公敬德段褒

公志玄等合二十二人

不點目睛

顧愷之每畫神成或數年不點睛人問之答曰傳神寫照正在阿堵中耳阿堵猶言那個也

明點瞳子

愷之欲圖殷仲堪堪有目疾固辭愷之曰明府正為眼耳若明點瞳子飛白拂上使如輕雲之蔽月豈不美乎仲堪從之

宜置丘壑

顧愷之為謝鯤像在石岩裏云此子宜置丘壑中按晉  
明帝嘗謂鯤曰以君方庾亮何如鯤對曰端委朝堂使  
百僚準則鯤不如亮一丘一壑自謂過之

欲置山岩

東坡贈寫真何克秀才君不見潞州別駕眼如電左手  
挂弓橫撚箭又不見雪中騎驢孟浩然皴蒼吟詩肩聳  
山饑寒富貴兩安在空有遺像留人間此身常擬同外

物浮雲變化無踪跡問君何苦寫我真君言好之聊自  
適黃冠野服山家容意欲置我山岩中勲名將相今何  
限往寫褒公與鄂公

頰上益三毛

世說顧長康畫裴叔則像頰上益三毛人問其故顧曰  
裴楷雋朗有識具正此是其識具觀者覺神明殊勝  
看後加三紋

蘇東坡傳神記傳神之難在目其次在頰頰吾嘗于燈

下顧自見其頰影使人就壁模之不作矚目見者皆失  
笑知其為吾也目與顧頰似餘無不似者矚與鼻口可  
以增減取似夫傳神與相一道欲得其人之天法當于  
衆中陰察之今乃使人具衣冠坐注視一物彼方斂容  
自持豈復見其天乎凡人意思各有所在或在矚目或  
在鼻口顧虎頭云頰上加三毛覺精采殊勝則此人意  
思蓋在鬚頰間也優孟學孫叔敖抵掌談笑至使人謂  
死者復生此豈舉體皆似亦得其意思所在而已使畫

者悟此理則人人可以為顧陸吾嘗見僧惟真畫曾魯公像初不甚似一日往見公歸而喜甚曰吾得之矣乃於晷後加三紋作俛首仰視晷揚而頰蹙者遂大似南都程懷立衆稱其能於傳吾神大得其全故以吾所聞助發云

麋鹿姿

宋朱元晦贈寫真郭拱辰序世之傳神寫照者能稍得其形似已得稱為良工郭拱辰叔瞻乃能并與其精神



意趣而盡得之斯亦奇矣拱辰嘗為予作大小二像宛然麋鹿之姿林野之性持以示人計雖相聞而不相識者亦有以知其為予也因其告行書以為贈

龍鳳質

東坡贈寫御容妙善師天容五色誰敢畫老師古寺畫  
閉房夢中神授心有得覺來信手筆已忘幅巾常服儼  
不動孤臣入門涕自滂元老俯坐鬚蒼古虎臣侍立冠  
劍長平生慣寫龍鳳質肯顧草間猿與獐都門踏破鐵

門限黃金白壁空堆牀邇來摹寫亦知我謂是先帝白  
髮郎

東方朔畫像

夏侯湛孝若贊矯矯先生肥遯居貞退不終否進亦避  
榮臨世濯足稀古振纓涅而無滓既濁能清我來自東  
言適茲邑敬問墟墳企佇原隰徘徊寺寢遺像在圖周  
旋祠宇庭序荒蕪肅肅先生豈焉是居昔在有德罔不  
遺靈天秩有禮神監孔明彷彿風塵用垂頌聲

呂洞賓畫像

滕宗諒守巴陵有華州回道士上謁風骨聳秀滕知其  
異人口占詩贈之曰華州回道士來到岳陽城別我游  
何處秋風一劍橫回聞之憮然大笑而別或云諒密令  
畫工圖其形

杜甫畫像

王介甫贊吾觀少陵詩謂與元氣侔力能排天幹九地  
壯顏毅色不可求浩蕩八極中生物豈不稠妍醜巨細

千萬殊竟莫見其何雕毀惜哉命之窮顛側不見收青  
衫老更斥餓走半九州瘦妻僵前子扑後攘攘盜賊森  
戈矛嘗願天子聖大臣各伊周寧令吾廬獨破受凍死  
不忍四海赤子寒颼颼傷屯悼屈止一身嗟時之人我  
所羞所以見公像再拜涕泗流推公之心古亦少願起  
公歿從公好

李白畫像

陳后山和饒節詠周昉畫李白像醉色盡玉色起分明

尚帶金井水烏紗白苧真天人不用更著山巖裏

武侯畫像

張敬夫贊惟忠武侯識其大者仗義履正卓然不捨方  
卧南陽若將終身三顧而起時哉屈伸難平者事不昧  
者機大綱既得萬目乃隨我奉天討不震不竦惟其一  
心而以時動噫侯此心萬世不泯遺像有嚴瞻者起敬

桃椎畫像

括異記成都畫師姓許善傳神一日有道人敝衣容貌

憔悴求傳神許笑之其人解布囊出黃道服鹿皮冠白玉簪頂冠易衣危坐以手摩面則童顏矣引其鬚應手而黑乃一美丈夫也許驚曰不知神仙臨降道人曰君傳吾神置肆中有求售止取千錢後有識者云此唐神仙朱桃椎像也求者輻輳許貪畫直每像輒取二千夢道人謂曰汝福有限安得過取掌其左頰既寤頭遂偏

裴晉公畫像

裴晉公自題畫像贊爾才不長爾貌不揚胡為將胡為

相一片靈臺丹青莫狀

韓文公畫像

筆談世人畫韓退之像小面美髯乃江南韓熙載耳熙載謚文靖亦謂之韓文公因此謬為退之退之肥而寡髯後世不復辯也

歐文忠畫像

陳后山云歐陽公像公家與蘇耆山皆有之而各自是也蓋蘇本韻勝而失形家本形似而失韻形而不韻乃

所謂畫非傳神也

張乖崖畫像

宋張乖崖公守蜀及代去留一卷實封文字與僧正希  
白且云候十年觀此後十年公薨于陳州計至蜀人罷  
市號慟希白為公設大會齋請知府凌策諫議發開所  
留文字乃公畫像衣兔褐繫緇草裹自為贊曰乖則違  
俗崖不利物乖崖之名聊以表德遂畫其像于天慶觀  
仙遊閣又為之立祠



朱晦庵畫像

陳同父贊體備陽剛之純氣含喜怒之正粹面盎背吾不知其何樂端居深念吾不知其何病置之釣臺擦不住寫之雲臺捉不定天下之生久矣以聽上帝之命

呂伯恭畫像

朱元晦贊以一身而備四氣之和以一心而含千古之秘推其有足以尊主而庇民出其餘足以範俗而垂世

楊誠齋畫像

誠齋自贊汝翎弗長汝趾弗強毋駛汝頑毋競汝驤于  
崖于濱其窈其茫曠曠見光弋誰汝傷秋作月荒春作  
花荒哦者遜兀醜者遜狂汝老是鄉莫與汝爭銜

張敬夫畫像

朱元晦贊擴仁義之端可以彌六合謹義利之辯至于  
析秋毫拳拳乎其致主之功汲汲乎其幹父之勞仡仡  
乎其任道之勇卓卓乎其立心之高知之者識其春風  
沂水之樂不知者以為湖海一世之豪彼其揚休山立

之姿既與其不可傳者死矣觀于此者尚有以卜其見  
伊呂而失蕭曹也

辛稼軒畫像

陳同父贊眼光有稜足以照映一世之豪背脾有負足  
以荷載四國之重呼而來麾而去無所逃天地之間撓  
弗濁澄弗清豈自為將相之種故曰真鼠枉用真虎可  
以不用而用也者所以為天寵也按稼軒名棄疾字幼  
安

周子充畫像

子充自贊方丈蓬瀛早陪羣英鳳掖鼇扃中敷帝文晚  
侍嚴宸徧持樞紐若非精神滿腹則當容貌動人何斂  
頤而折頰弗走俗而抗容豈所謂相形不如相心見面  
不如聞名者耶

張功父畫像

楊誠齋贊功父像香火齋祓伊蒲文物一何佛也襟帶  
詩書步武瓊琚又何儒也門有珠履坐有桃李一何佳

公子也冰茹雪食瑀碎月魄又何窮詩客也約齋子方  
內歟方外歟風流歟窮愁歟老夫不知君其問諸白鷗  
按功父名鎡號約齋循王之孫也有吏才能詩

蘇東坡畫像

黃魯直贊出於峨眉耆司馬班揚金馬石渠閣士如牆上  
前論事釋之馮唐言語以為階而投諸雲夢之黃東坡  
之酒赤壁之笛嬉笑怒罵皆成文章解羈而歸紫微玉  
堂子瞻之德未變于初爾而名之曰元祐之黨貶之朱

崖僖耳方其金馬石渠不自知其東坡赤壁也及其東坡赤壁不自意其紫微玉堂也及其紫微玉堂不自知其朱崖僖耳也九州四海知有東坡東坡歸矣民笑且歌一日不朝其間容戈其一丘一壑則無如此道人何

濂溪畫像

以下六贊皆朱元晦著

道喪千載聖遠言湮不有先覺孰開後人書不盡言圖不盡意風月無邊庭草交翠

明道畫像

揚休山立玉色金聲元氣之會渾然天成瑞日祥雲和  
風甘雨龍德正中厥施斯普

伊川畫像

規員矩方繩直準平允矣君子展也大成布帛之文菽  
粟之味知德者希孰識其真

康節畫像

天挺人豪英邁蓋世駕風鞭霆歷覽無際手探月窟足  
躡天根閱中今古醉裏乾坤

橫渠畫像

早悅孫吳晚逃佛老勇撤臯皮一變至道精思力踐妙  
契疾書訂頑之訓示我廣居

涑水畫像

篤學力行清修苦節有德有言有功有烈深衣大帶張  
拱徐趨遺像凜然可肅薄夫

贈寫真李道士

蘇子由贈寫真李道士君不見景靈六殿圖功臣進賢



大羽東西陳能令將相長在世自古獨有曹將軍嵩高  
李師掉頭笑自言弄筆曹前身百年遺像誰能識滿朝  
冠劍多偉人據鞍一見心有得臨牕相對疑通神十年  
江海鬚半脫歸來俛仰慙簪紳一揮七尺倚牆立客來  
顧我誠似君金章紫綬本非有綠蓑黃筍甘長貧何如  
畫作白衣老置之茅屋全吾真

贈寫真王處士

楊廷秀贈寫真水鑑處士王溫叔我不如森森千丈松

我不如濯濯春月柳髮踈鬢禿已雪霜皮皺肉皺真老  
醜葉生畫時顏尚朱王生畫時骨更癯一生愛山吟不  
就兩肩化作秋山瘦君不見褒公鄂公圖凌煙腰間羽  
箭大如椽又不見浣花醉圖粉墨落日斜泥滑驢失脚  
貴人寒士兩相嗤畫圖猶在人已非王生王生且停手  
不如生前一杯酒

難寫精微

宋胡邦衡贈寫真劉琮畫莫難于寫真非寫形似之難

寫心之精微為難也蓋君子小人貌或類而心不同寫其形似而不得其心之精微或以小人為君子未見其能寫也鄉老劉琮慶先天機精到得金粟影筆法恨世無褒鄂之毛骨以發其竒或逢佳士或尋常人質鬼貌藍欽頤折額時一弄翰曲盡形似雖君子小人骨相或同間不容髮而其心判然自殊如涇渭之不相亂老杜所謂乃知畫師妙巧括造化窟其在斯人歟按金粟影者老杜詩云虎頭金粟影神妙獨難忘蓋佛經有金粟

如來顧愷之所畫維摩居士像即金粟影也

兼移情性

畫斷郭汾陽女婿趙縱令韓幹寫真又請周昉寫真二人皆有能名令公嘗列二真于坐末未能定其優劣因女趙夫人歸省問云此何人對曰趙郎也又云何者最似曰兩畫總似前畫得趙郎形貌後畫兼移其神思情性笑語之姿是日定二畫之優劣

山堂肆考卷一百六十七